

G R S

1 5 7 2

M

A 57

~~I. I.~~
~~2 F. 7, 415.~~

℥

Kellermeisteren.

Gründlicher be
richt / Wie man alle wein
vor allen zufellen bewaren / die
bresthafften widerbringen / Kreuz
terwein / Bier / Essig / vnd alle an
dere getrenck machen sol / das sie natür
lich / vnd allen menschen vnscheds
lich zu trincken sind.

Gezogen auß den fürnembsten
Büchern / natürlicher Künsten

Mit solchen stücken bewert / der
gleichen in Truck vorhin nie außgangen.

Durch

Paulum Schneider / von Eger.

Nürnberg / M. D. L. X. I. I. I.

Cum Priuilegio

Den Ehrenue-
sten / Fürsichtigen / vnd
Wolweyßen Herrn / Burgermei-
ster / Rath / vnd Gemeine zu
Eger / meinen großgünsti-
gen / vnd gebietenden
lieben Herrn / c.



Nach dem ich zum
ersten von heimat
ausgewandert / mich
etwas vnder den
frembden zumerfu-
chen / vnd dienen
lernen / ist e. jezund
ein vnd zweingig Jar / Diweyl
mir meine lieben Eltern gar we-
nig mit verlegung / vnd anderer
noturft / als vnuermöglich helfen
kondtē / bin ich also jung in Böhheim
gezogen / alda in diensten ein zeyt
A ij lang

lang mich enthalten / vnd von meis-
nem Herren zu einem Wein vnd
Bierschencken bin gebraucht wor-
den. Nach dem aber / ich lust gewun-
nen / auch frembde vñ weitere land
zu besehen / bin ich hinab in Ungern
gen Bressburck / zu meinem gnedi-
gen Herrn / Herrn Grauen Ni-
clas von Solm befürdert worden /
vnd im Keller gedienet. Dieweyl
aber die verwaltung an solchem ort
etwas grössers / von wege des gros-
sen weins / so an bemelten orten ge-
meiniglich bey einander ligt / vnd
auch tegliche wart vnd Arbeyt
schwerer vnd fleysziger sein must /
hab ich alda angefangen fleysziger
zu mercken / vñ zusamen zutragen /
alles das / so ich von meinem Herrn
Kellermeyster gesehen vnd geler-
net / Welcher nit allein seines thuns
sehr fleyszig gewartet / sonder auch
berümbt von wegen seiner geschick-
ligkeyt zum Wein war. Hab also
ye lenger ye mehrer lieb vnd lust ge-
habt /

gehabt / solches auch selbs für mich
vnd andere zubrauchen . Darumb
ich mich auch gar zur Kellerey be-
geben / vnd von dannen in Osterreich /
Weychsen vnd Lausniz fer-
ner verrücket / allein darumb / das
ich dester mehr erfahren / vnd lernen
möchte / Bin ich also auff diese zeyt
meinem fürnemen / so viel Gott ge-
nade verliehen / nachkommen / viel
Wein vnd Haußkunst zusammen
bracht / dieselbigen bis auff die zeyt
heimlich gehalten. Wiewol ich zum
öftermal auch angemut bin wor-
de / solche / andern zu gut in truck zu
geben / Bis ich lezlich zu Türnberg
vngesehr vber ein deutsch buch kom-
men / so inn Laccinischer sprach ge-
schrieben: Von gebürlichen werckē.
Den also stehet der Tittel: In wel-
chem ich gelesen / das Plato ein al-
ter Heidnischer Philosophus ge-
leert hab: Kein mensch werde ihm selber
geborn / sonder drum / das er seine
Vatterland diene / zum theyl seinen
A iij guten

guten freunden/Welchs wie es von
einem Heidnische Philosopho hoch
bedechtig geredet / hat es mir also/
als einem Christen mehr nachges
denckens gemacht/als der ich mich
viel mehr schuldig weiß/ vnd erken
all mein leben zu wolffart vnd nutz
meines nechsten zurichten/bin end
lich nach meinem geringen stande
dahin beweget/so vil mir möglich/
das meinig zuthun/vnnd meinem
nechsten zu gut/ das mir lange zeyt
saur worden/nit zuuerhalten. Das
rumb / was ich auch dazumal bey
handen gehabt/in ein büchlein ge
ordnet/des willens in den druck zu
verfertige. In dem aber da ich hin
vnd wider dacht/wem ich doch sol
ches zuschriebe/wie sonst breuchlich/
fellet mir zu/ dieweil ich dem Pla
toni folget (inn dem das ichs wey
ters nicht heimlich halte) solle ich
billich inn dem auch seiner meinung
nachkommen/das ichs meinem lie
ben Vaterlandt zuschriebe / nicht
darumb

darumb / das ich damit ehre zu erlangen begere / oder viel von mir selbst / vnd von diesem büchlein hielte / sondern euch / vnd jederman zu beweysen / wie gern ich wolt nach meinem geringen stand / auch mich gegen meinem geliebten vatterlande danckbar erzeygen. Bitte derhalben ꝛ. ꝛ. wöllet diß mein (wie wol etwas gering) jedoch nicht vnützes Büchlein / zum newen Jar günstig annemen. Befilhe mich hie mit inn ꝛ. ꝛ. günstige befürderung / 2c.

ꝛ. ꝛ. W.

Untertneniger /

Paulus Schneider.

A iij Von

Von etlichen
nützlichen künsten zu
den Weinen dienend/2c.

Wie man den Wein ein
ganzes Jar/oder lenger süß sol
halten / der Wein werde das
Jar saurer oder süß.

Man sol nemē den wein
von der Press / oder
Kelttern / vnd den inn
ein groß Faß giessen/
vnd sol denselbigen sich setzen las-
sen auff den boden / denselbigen
abgezapfften wein sol man durch
Hefle speen giessen / inn ein Faß/
oder viere / Derselbige wein wirdt
also

also gereiniget/das er darnach kein
vnsauberkeyt mehr in jm habe / die
dem Wein möchten schaden.

Mit diesem Wein magst du
wol vil wein süß machen.

Nach dein gut düncken/solt
du giessen des Weins inn ein Faß
eines andern groben Weins / so
wirdt der wein mild / vnd wolge-
schmack.

Vnd muß auch solches gesche-
hen an kalten stetten / vnd kalten
gemachen.

Mit solcher weys behelt man
den wein mit aller sterck vñ krafft
süß/als ein Meth.

A v Ein

Ein ander frembd stück/
zu den Weinen.

Wie man ein faß zurich-
ren sol/das der wein darinn nim-
mer kun noch rot werde.

Schwefel sol man nemen/
vnd in zergehen lassen/vnd wenn
er zugangen ist/so geuß ihn inn ein
Wasser/vnnd darnach sol man ihn
wider herauf thun / vnnd wider-
umb lassen zergehen / wie vor / so
wirdt er gereinigt von aller sei-
ner schedligkeyt. Man sol auch
nemen weisse Meyelwurtzel/vnnd
sol sie drück en inn ein bedck / ob ein
feuer/vnd darnach klein gestossen/
vnnd durch ein sieb reden /das pul-
uer behalt inn einem Büchlein /
darnach nimb ein weysen Wey-
rauch

2
rauch auch klein gestossen / vnnnd
Deyelwurtzel / eins als viel als des
andern. Nimb darnach drey Hefle
speen / anderthalb spannen lang /
vnd zwen finger breit / vnd zerlaß
den schwefel / vnnnd zeuch die speen
dardurch / dieweyl der Schwefel
warm ist an den speen / so spreng
das puluer darauff / auff beide sey-
ten / so sein die speen bereyt zu brau-
chen / wenn man wille / zc.

Wenn du nun ein faß damit
wilt bereyten / so kere das faß vn-
tersich / vnnnd zünde die speen an /
einen nach dem andern / vnnnd halte
in inn das faß / so lang biß er ver-
brennt / darnach aber den andern /
thue dem dritten auch also. Das
faß aber verstopffe wol / damit
kein rauch herauß mag / vnd nichts
auff / laß knastern. Wiltu / so magst
du

du alle die faß bereydet inn Herbst
schicken/dabeimen aber thue wein
drein / so wirdt der wein nimmer
Konig oder Rotfarb / vnd bleibe
allezeyt weiß vnd frisch / vnd wirt
nicht weich oder zehe / man für ihn
vber land / oder laß ihn ligen.

Das ein wein niche Konig werde.

Nimb klein gestosnen Borras /
vnd den in den wein geworffen /
oder drey hand vol saltz inn einer
pfannen wol gebrendt / inn Wein
gethan vnd zugespünd / vnd vber
acht tag abgelassen.

Wenn ein wein ist Konig
worden / wie man ihm
helffen soll.

Nimb

3
Nim ein hand vol saltz/darnach
das faß groß ist/laß das auffß aller
heiste werde/das ganz gliend ist/
thue das zum spund hinein/ vnd
machs zu/vnd laß es durch eman-
der arbeiten/schadt dem Wein nit.
Du must ihn aber ablassen/ das
magstu thun/wenn du wilt. Ist
auch gut für das auffstegien der
wein/rc.

So der wein auffge-
standen vnd braust/wie
ime zu helfen sey.

Nimb ein Schießpuluer/den
vierdten theyl eines schuß / thu es
in das faß weins/so wirt er schön/
gut vnd lauter. Item/ so er auff-
steht vnd praust/ nimb bley oder
zin/ bey einem pfund /laß zergehen/
geuß

geuß inn das faß also heuß / so setze
sich der wein / vnd wirt stille.

Seigern wein lauter
zu machen.

Nimb Rosin vnd rauten /
legs inn wein / so kombt er wide-
rumb zu seinen kressen.

Trüben wein lauter
zu machen.

Nimb das weysse von Eyern /
schlags wol / geuß in wein / so wirt
er klar.

Sicken wein dünne
zu machen.

Nim senfft / vnd stosse den klein
mit wein / in einer senfftmüle / vnd
geuß den inn das faß / inn den di-
cken

4
den wein/rüre in vnter einander/
mit ein heflin stecken/von grund
auff/ein gute weil/laß ihn drey tag
ligen/so wirt er gut.

Wenn sich der wein
gern verkeert.

Wenn man vmb Weyhenach-
ten mit wein vmbgehet/ so verke-
ret er sich gern / vnd wirdt plau /
Darumb sol man in vmb dieselbi-
bigen zeyt ruhen lassen.

Wilt du trüben wein
gut machen.

Nim ziegen milch oder laugen/
gies sie in das faß/rüre ihn mit ey-
nem langen stecken / der weyß ist/
so fürt die Milch das trübe inn
grund der heffen.

So

So der wein Rotfarb/
vnd hat sich verkeret.

So nimb zu einem halben fu-
der zwölff Eyer/schlags wol/ vnd
geuß daran zwō maß ziegē milch/
rüre es wol vntereinander / geuß
als denn in den wein/ rür in wol/
so wirt er gut.

Ein lehre guten wein zu-
erkennen/ vnd zu kauffen.

Wenn der Wein von ersten
scharpff ist/ vnd scheumet nicht/
vnd springt/ wenn man ihn ein-
schendert/ so ist er ohn wandel/ Vnd
der Wein mitten im faß angesto-
chen/ ist der best/ vnten angestochen
ist schlechter.

So

5
So du wilt guten Wein
behalten / so solt du das faß erstlich
oben / vnd so du ein weyl dauon
getruncken / gar vnten anstechen.

Wilt du linden wein
frisch machen.

Nim rinden von sichtigem holz /
daran viel bechs ist / zubrichs klein /
thus in den wein / vnd nim bircken
holz / schneid speen dauon / vnd thu
sie auch darein / thür den wein wol
mit einem holz / vnd laß ihn ru-
hen biß an den sechsten tag / so wirt
er frisch.

Wenn der Wein nach
dem faß / oder nach was
anders schmeckt.

Nim ein hand vol Saluien in
B in

ein schönes leines secklein / vnd
hendts inn das faß / so verleurt der
Wein den abgeschmackt inn einem
tag / darnach thues wider herauf.

So der wein begint
sauer zu werden.

So thue darein ein wenig
Seyffen laugen / so vergehet ihm
die sewre.

Das der new wein gut
vnd stark werd.

Nim Weinstock wurzel / oder
weinblühe gedört / vnd legs inn
wein / machet den wein gut vnd
stark.

Wenn der wein trüb ist /
vnd wil nit klar werden.

Zench

8

Zeruch in ab/vnd nimb darnach
zu einem faß weins/zwey stüliche
warm gemolckene milch/ vnd leg
darein bonen/bis sie darinnen auff
keinen/laß als denn so viel Weins
auff dem faß / vnd seihe/oder gieß
die Milch darfür hienein / bewege
oder rür das faß mit dem Wein
ein halbe stund/so wirt er klar.

Seigern wein zu temperieren.

Nim auff ein eimer weins ein
quarten Wassers/ein pfund saltz/
ein maß milch/vnd vier eyer klar/
ein maß gesotten Erbesbrüe /vnd
thus darein.

Wilt du ein newen wein
machen das er schmecke / wie
ein Welscher wein.

B ij Nim

Nim ein lot Negelein/ Klein ge-
stossen/ bind es in ein secklein/ Nim
ein newen topff/ thu das secklein
darein/ geuß des Weins vier maß
darein/ laß ein halbe stund sieden/
laß wider kalt werden/ geuß ins
faß/ vnd henc die negelein darein/
so hastu ein guten wein.

So der wein vnge-
schmack ist worden.

Nim ein kraut /das heist Sinau/
vnd nim ein newen topff da vier
maß darein gehen / siede es mit
wasser/ vnd prüe das faß damit
auf/ so gewint der wein widerum
ein guten geschmack.

Ist der wein zehe worden/ oder
seiger/ ziehe in ab inn ein ander faß/
das rein ist / durch dörner oder ein
besen

7

besen / vnnnd nimb zu einem fuder
vier pfund weinstein / stoß in klein /
vnnnd geuß daran ein maß guten
wein / vnnnd vier maß des trüben
weins / den du ablest / rürs wol /
geuß inns faß / so kombt der wein
wider zu seinen krefftten.

Wie man den wein ko=
sten sol / ob er verdorben
sey oder nicht.

Wenn du den wein abzeichst
von der heffen / so laß die heffen et=
liche tag stehen vnnnd zugedeckt /
darnach riech ins faß / reucht die
heffen / ist abgeschmack vnd stinckt /
so verdirbt der wein / rür die hef=
fen mit einem st. kleim / reuch dar=
ein / so erkennest du die tugend des
weins. Oder seud in / vnnnd laß ihn

B ij wider

wider kalt werden / so sihestu wie
er schmecket.

Das der Wein ein gutert
starcken geschmack gebe.

Beyfuß samen zurieben / vnd in
wein gethan / reinigt den wein / vñ
macht in schön / vnd bleibt die hef-
fen auff dem grund / vñnd gibt dem
wein ein gutert starckē geschmack.

Den wein lind zu-
machen.

Nim eichene rinden / vñnd mach
aschen darauß / vnd thue die in den
wein / so wirdt er lind.

Wenn der wein ein böser
geschmack gewindt von dem faß /
wenn es schimlich / oder sonst
mit rein gewesen were.

Nimb

8

Nimb ein handvol Lein in ein
secklein / vnd hencf es in den wein /
so verleuret der Wein den bösen
geschmack in dreien tagen / so zeuch
als den das secklein wider herauf.

Wenn der wein sich zer-
brochen vnd verkeret hat / oder
ist abgeschmackt worden.

Nimb Cordabenedicta / vnd
hengs inn wein / den bringt sie wi-
der inn sein krafft / vnd macht in
wolriechend.

Wenn der wein schwer
ist / stincket oder ist sawer
worden.

B iij Schlag

Schlag in mit einem löcherten
stecken/vñ spund darnach das faß
zu/vnd wend es hin vñnd her/Als
den̄ thu darein gebranten lein / vñ
schlag den wein wider wie zuvor/
so wirt er in dreien tagen gut/ dar=
nach geuß ein wenig ziegenmilch
darein/ vñnd misch den wein aber
wol/so wirt er klar vnd frisch.

Wenn der new wein trüb ist/
vnd doch frisch vnd gut/vñnd nit
seiger noch gebrochen/so thu dar=
ein ein ziegenmilch / vñnd misch
durch einander/so wirdt der wein
lauter vnd frisch.

Das der wein bey farb/
geschmack/ vñnd vnuerwandelt
bleyb / wenn man ihn an=
gezepft hat.

Vññ

9
Nim weidaschen ein theil/ vnd
thu in inn ein secklein/ vnd hend's
ins faß/ weñ du den wein wilt auf
thun/ so bleibt der wein bey farb/
geschmack/ vnd verwandelt sich
nit/ wie lang man dauon trink't.

Das der wein gut werde.

Nim hanputzen / sunst hießten
genandt / von den grossen schneid
das rote heutlein dauon/ vnd thu
die kerer inn ein schöns tüchlein /
vnd hend's in den seigern wein/ so
wirt er gut.

Wilt du wissen ob was=
ser im wein sey oder nicht.

Nim Wachalterbeer/ vnd laß
sie in dem wein schwimmen/ schwim

B v men

men sie empor/ so ist der Wein ge-
recht/fallen sie aber zu grund/so ist
der wein mit wasser gemischt. O-
der geuß den selben wein inn einen
newen krug/ vnnnd werme in bey
dem feuer/darnach laß ihn wider
kalt werden/wirdt er zu Essig/so
ist er mit wasser gefüllet.

**Wilt du im das wasser
aufziehen.**

Nimb der grossen pinzen / vnd
schele den kerer heraus / vnnnd lege
in inn den Wein/ so zeucht er das
wasser an sich.

**Wiltu roten wein blanck/
oder weiß machen.**

Nimm

10

Nimb das weyß von zwölf
eyern/vnd puluer das/thu das pul
uer in ein leinen tüchlein/vnnd seibe
dadurch den roten wein/so wirdt
er blanck vnd weyß.

Wilt du wissen welche
wetter dem Wein scha
den bringen.

Erstlich soll man des Weins
hüten für den Ostwinden / Vnd
darnach für vbriger hitz vnnd kelt.
Zum dritten/ wens regnet / Don
nerst oder blitzet/so sol man die faß
wol bewaren/den es ist dem wein
shedlich / vnnd stehet gern auff/
wenn man zu solcher zeyt nit ach
tung darauff hat.

Wilt

Wilt du erkennen ob ein
wein bestendig sey oder nit.

Nim ein rhor das gar hol ist/vñ
stof es durch den wein im faß bis
auff den grund durch die hessen/
vñnd halt als denn das rhor oben
mit einem finger zu/ ziehs herauf/
vñnd schmeck zu der hessen/reucht
sie wol/so bleibt der wein bey sey-
ner farb/vñnd bestendig/hat aber
die hessen einen argen geschmack/
so ist der wein nicht bestendig.

Ob der wein bestendig
bleyb oder nicht.

Heb des weins auß einem faß
mit einem rhor inn einen becher/ist
er bestendig/so vergeht im der gest
oder schaum von stundan/ bleibet
aber

11
aber der schaum/oder gest lang / so
ist der wein nicht bestendig.

Wer des weins pflegen
wil/wie er seine faß halten sol.

Er wasch die faß zum ersten
von der heffen / vnd spül sie rein
aus mit saltzwasser/vnd trückne
sie wol vnd oft auß an der Sonnē
vnd beraucher sie oft mit wey-
rauch oder einem schwefel liecht/
was denn für wein darein kompt
der gieret sehr/vnd wirdt lauter/
schön vnd bestendig.

Wilt du dem wein / den
Schwefel nemen.

Nim ein neuen dopff oder haf-
fen/vnd lege ihn auff die kolen das
er

er wol glüendt werd/ vnnnd stürz
in vber den Wein/so zeucht er den
Schwefel an sich/wie vil du wilt.

Wein sehr zehren zuma-
chen/das er frisch werde.

Nimb drey oder vier saure öpfa-
fel/schneid die/ vnnnd würff sie in
den Wein/vnnnd wenn ihm der ge-
schmack vergeht/so thue sie wider
herauf/ vñ thu so vil frische wider
hienein/das thu so lang bis er wol
gejaren hat/so wirdt er frisch vnnnd
gut.

Wenn man den wein
ruhen lassen sol.

Zu Weihenachten/vnd wenn
der

Der Wein blühet / so reget sich der
wein / vnd giert auff's new wider /
darumb sol man im zur selben zeyt
kein lufft lassen / so bleibt er on wan
del.

Wilt du das sich der wein
setz / wenn du in gerürt hast.

So thu darein kleine kieselstein /
auff einem kalten Wasser / auff ein
theyl / der Wein setzet sich schon
dauon.

Das ein wein nicht
jehre.

Wilt du dem Wein das jehen
wehren / es sey am leger / oder am
fahren / so würff ein wenig kess da
rein.

Das

Das sich ein Wein nicht
verkerre/oder seiger werde.

Geuß in ein ganz fuder wein
ein vierteil aqua uitæ/ von gutem
wein gebrent/so wirt er nicht sey-
her oder misfarb / sondern lauter/
klar vnnnd wolgeschmack zu trin-
cken / weyl er wehret / das thu im
Herbst wenn er gieret.

Zu probieren ob Wasser
im Wein sey.

Schwimmet ein beer von ein
wein trauben/oder ein new gelegt
ey im Wein/so ist er gerecht/felt es
aber zu grund / so ist Wasser dar-
unter . Oder nimb desselbigen
weins inn ein neuen Hasen/ver-
mach in wol/vnnnd laß in drey tag
stehen/

stehen/oder im lufft hangen / was
 als denn für wein darinnen ist/ der
 tropffte heraus / Das wasser aber
 bleibt darinnen/oder zu zeiten ver
 wandelt er sich auch in Essig.

Eim wein die farb wider
 zu bringen.

Nimb zu einem fuder weins ein
 becher vol Rüe milch/ vnd so viel
 Weitzen körner/stof die bis die euf
 sersten schelffen dauon kommen /
 wasch darnach inn einem reinen
 wasser/vñ thu sie also ganz vnter
 die Milch/vnd darnach ins faß/
 beweg den Wein wol mit einem
 gespalten holtz/ füll vnd spund in
 darnach zu / nach vierzeihen tagen
 ist der Wein schön vnd kressig.
 Die milch gibt ihm die farb/ der
 weiz den geschmack.

E Oder

Oder schlage vier vnd zwein-
zig eyer klar auß / vnd nimb geleu-
terten sand / vnd griesß semelmehl /
vnd des weins ein becher vol / mi-
sche es vnter einander / vnd geuß
drey mal ins faß / jedes mals so vil /
vnd rür den wein mit einem gespal-
tenen löcherten holz / wol vnter
einander / zc.

Etliche zünden Ephau an / vnd
leschen es inn demselben wein ab /
oder werffen Espe rinden inn den
wein / das widerbringt den gebro-
chen / wein.

Das ein wein nit breche /
noch an der farb verwandelt
werde / so lang er wehret.

Nim ein gebrenten leimen / mach
jn mit ein wein an / vnd verkleib
den spund damit / thu zuuor ein re-
ben.

14

benaschen / durch ein sieblein auß-
geredelt inn wein / oder vier finger
dick auff den spund / das der Wein
nicht außriechen kan / thue als denn
darauff einen grünen wasen / vnd
vor durch den spund ein lustlöch-
lin / mach dasselbig / so oft du wein
gelassen hast / mit einem zepflein
auffs gehest wider zu.

Seygern wein wider zu bringen.

Nimb ein becher vol gestossen
Weinstein / vnd so viel Neben-
aschen / thu darunter so viel weins
auff dem faß / mische es wol durch
einander / vnd geuß ins faß / vnd
thu das drey mal nach einander /
beweg den Wein / jedes mal wol
mit einer Kluppen / sammel dara-
nach den schaum auff / vnd thu ihn

E ij wider

wider ins faß / fül das faß nicht gar
vol / wenn du es bewegst / es laufft
sunst viel auß.

Oder hencf ein handvol Messel/
mit den wurzeln gereinigt ins faß /
vnd ob sie samen hetten / zeytig o-
der nit / so thu in darvon.

Ein anders / seygen wein wider zu bringen.

Nimb ein becher des abgefal-
len weins / vnd eins vierten theils
so vil saltz / send es in einem newen
hafen wol / vñ verschäum es / geuß
also heiß ins faß / bewegs wie oben
stehet / bis es wirt / als wolt es jhe-
ren / darnach hencf bley oder sta-
helblech darein / so wirdt der Wein
frisch.

So

15

So der wein Effigeint /
oder anzickt.

Nemck inn ein fuder ein becher
vol lange Danzapffen / oder so vil
weizen gereinigt von belgen / vnd
ein pfund newes wachß / so wirdt
er für dem anzicken behüt.

Das sich der wein
nicht verrege.

Nimb der bitteren mandel / vnd
bertram / thus in kalt wasser / sche-
le darnach die haut herab / schneid
das ander klein / vnd leg in wein.

Das der wein wider zu
im selber komē / vnd gut werde.

Nimb das weiß von eyern / vnd
E iij zer-

zerschlahe das wol mit einē salz/
vnd geuß in wein / vnd zerschlahe
ihn sehr / so kombt er wider zu ihm
selber / inn drey tagen / Darnach laß
den wein ab / das er nit schmeckent
werde nach den eyern / so wirdt er
gut.

Das der wein nicht
schwecher werde.

Nim zwey stück weyrach / vnd
legs in wein der abnimbt / so wirt
er nicht schwacher.

Guten milten wein zu
machen / das er bleib.

Wenn der wein gieret / so sol
man ein stück speck darein hengen
in einem saubern secklein / vnd das
spundloch vermachen / das nur ein
kleins

16

Kleins luffelöchlein behelt / so bleibt
der wein inn reiner gier / vnd wirt
süß / schön vnd lauter.

**Wilt du guten süßeren
wein machen.**

Nimb den wein von stund an
von der kaltern / vnd thu in inn ein
Kessel / vnd laß ihn vber sich sieden /
bis der dritte theyl einseudt / dar-
nach thu ihn inn ein faß / so bleibt er
durch das ganz jar süß.

**So ein wein ein vbeln
geschmack hat.**

Nim ein hand vol saluien / vñ al
so vil hopfen / spalte ein grosse gal-
gant wurzel mittē entzwey / thus
E in in

inn ein leines secklein / hencßs drey
oder vier tag ins faß / so höret der
geschmack auff.

So der wein auffstehet.

Nimb pley zu einem eimer / ein
pfund / laß zergehen / geuß das inn
Wein also heiß / so setzt sich der
wein / vnd wirt stille.

Wie man alten verdor= ben wein wider new ma= chen sol.

Wenn du im herbst kälterst / so
nim̄ den alten verdorbenen wein /
rñ ziehe in ab / in ein grosse kuffen /
vnd wenn du den kuchen ein mal
verhawen hast / so nimb den drisch /
vnd thue ihn inn den verdorbenen
ab

abgezogenen wein/ das er vber
dem drisch zusamē gehe/laß in drey
tag also stehen/vnnd rür in alle tag
vier mal wol durch einander / das
er sich wol erwarme/darnach presß
in auß / wie du dem newen wein
thust/vñ thu in wider in zugerich-
te faß/vnd laß ihn wol verjheren/
darnach wenn er verjhozen hat/vñ
lauter ist worden / so ziehe ihn ab/
vnd mach ein guten ablaß darauf.

Nun folget hernach von
etlichen mösten.

Wenn die möste nit jeren
sollen / damit sie süß bleiben.

Numb vier oder fünff öpffel/die
da süsse sind/schneid die entzwey/
vnd würff sie ins faß / vnnd wenn

E v die

die öpfel ire kräfte verlieren/so thue
jhr aber so viel darein/als lang biß
der most verhozen hat! als denn
nimbsie wider herauf/so wirdt er
edel vnd gut.

**Wie man guten wein inn
mösten solmachen.**

Wenn der most im jheren ist/
als wenn er begint abzunemen/
vnd doch von dem jheren noch
warm ist/so geuß most darein/der
erst von der kelttern kombt / vnd
dazu gestoffenen Weinstein / nach
deinem gut düncken/vnd laß also
vntereinander jheren/wenn sich dz
gesetzt/so thu jm aber also/vnd das
thu vier mal/vnd laß das faß nicht
vbergehn von dem jheren/so wirt
der wein starck vnd gut/darzu süß
vnd trünckig.

Das

Das sich der wein nicht
verker/nicht breche/oder vn-
geschmack werde.

Wenn der most verihoren hat/
so henc̄ darein samē eines krauts/
heist/mille folium / oder schaffgar-
be.

Oder thu wachalter wurzel
darein / dieweil er gieret / oder ge-
bentelt mehl.

Das der most rein wer-
de/vnd ein guten geschmack
vberkomme.

Timb gebrenten leimen auß dem
ofen/zureib in/vnd thu in inn den
most so er verihoren hat/ oder inn
wein/macht den hübsch rein/vnd
gibt im ein guten geschmack.

Wer

Wer wein bewaren wil/
das er nicht breche/ als lang er
ihn halten wil.

Der laß machen ein trichterlein
von wachalter holtz/ thu es in den
most/ laß in dardurch jere / so wirt
der wein werhafftig vnd süsse.

So der most wil
vbergehen.

Thue krensamē darein/ so ver-
kert er sich/ vnd wirdt wol riech-
end/ süsse/ vnd sterck den magen/
vnd das haubt.

Das sich der most nicht
verfengt/ sondern werhafftig
vnd starck werde.

Foenum

Fœnum græcum in wein ge-
than / hilfft das er sich nicht ver-
sengt.

Das der most gut vnd
starck werde.

Wein gesotten / vnd in most ge-
than / in ein jedes fuder zwey oder
drey seidlein / macht dē wein starck
vnd gut / hastu aber keinen Wein /
nimb most / ist eben so vil.

Wiltu guten Rheinischen
wein / oder most machen / das
er recht vnd auch süsse
bleib / vnd nicht sey-
ger werde.

Wenn der Wein oder most auff
würfft den vnflat / so nimb ein ge-
bran-

branten wein/der gut vnd starck
ist/vnd geuß zwey oder drey halbe
seidlein darein/so wirdt er darnach
gut/wenn er sein zeyt gehabt hat/
vñ magst in haltē/so lang du wilt.

Sas der Most/bisz er zu
wein wirt / guten geschmack
vberkomme.

Zustos beysuß / dieweil er noch
grün ist/vnd henc̄ in in den most/
bis er zu wein wirdt/so gewint er
ein guten geschmack.

Ein wein lieblicher far=
be / vnd wol geschmack er zu ma=
chen / denn er gewachsen ist.

Nim̄ guten brandten wein/vnd
thue darein die nachgeschriebene
stück/

Stück / Ein vierdung galget / zwey
 lot Megelein / vier lot Imber / vier
 lot zimerrinden / zwey pfund pfier-
 singkeren / ein pfund weichsel kerē /
 vnd lasse es acht tag mit dem ge-
 branten wein stehen. Darnach solt
 du den wein ableutern / vnd den
 gebranten Wein inn den abgeleu-
 terten wein giessen / inn ein jeglichs
 faß nach deinem wolgefallen / viel
 oder wenig / nach dem du den wein
 kressrig haben wilt.

**Wenn der wein nicht
 schön wil werden.**

Nimm ein wenig weinstein vnd
 saltz / das wol heiß ist / vnd schön
 brunnwasser / mit ein wenig bran-
 ten weins / vnd geuß es oben zum
 spund hienein / vnd spund das faß
 zu / sol wirt der wein lauter.

Wie

Wie man aller=
ley kreuterwein machen
sol/ vnd zurichten.

Wie man guten wermuc
wein machen sol/von altem
vnd newem wein.

Nim auff ein eimer/ein hand vol
Wermut/die gut sey/ vnd acht lot
aland wurzel/ Ein handt vol rote
rosen/ein hand vol hirschzungen/
solches alles thu zusammen inn ein
sedlein/vnd hende es in dein wein
(sihe das das faß nit gar vol sey)
vnd ein gute weil darnach spund
das faß zu/welze es hin vnd wi=
der/bis das der Wein braust/vnd
wol sich erwermet / darnach lasse
in

ihn ligen eine nacht / Auff den mor-
gen spund ihn auff / vnd fülle in zu
mit gutem wein / so hast du ein gu-
ten wermut wein.

Wiltu aber den Wein machen
von newer wirtz / So must du
weisse hefle speen darzu nemen /
die müssen gewessert sein ein nacht
vnd wider getrucknet an der lufft
(nicht an der Sonnen) Darnach
thu die öbern angezeigten kreuter
vnd speen zusammen ins faß / vnd
habe acht / das sie nicht vor dem
spund ligen bleiben / vnd laß den
wein wol verjheren / so hast du gu-
ten wermut wein.

Ein ander weyß wermut
wein zu machen / im fall / ob man
die vorigen stück nicht zu
wegen bringen köndte.

D Nimb

Nim gute durre wermut / thu
sie inn ein eimerich faß ein hand
vol / sampt etlichen guten frischen
weinberen / geuß darein gutē most /
vnd vermach den spund / vnd
laß ein klein lufftlöcklein / so hastu
ein guten wermut wein.

Wie man weisen Rosen- wein machen sol.

Nim wilde rosen / die man heyst
feldtrosen / derre die ander Lust /
vnd thu sie sampt einen stein / der
die rosen nider wege / in ein sauber
leinen secklein / das thue ins faß / da
rinn vorn weisser most gegossen /
der im faß verhozen ist / vnd ver-
mache den spund wol zu / so hastu
ein guten rosenwein.

Zuff diese weysse magstu auch
ein

23
ein roten rosenwein machen/ aber
zu roten wein/must du auch rote
rosen nemen.

Wie man guten Saluiert wein machen sol.

Nim Saluien abgeschnitten
vor Johannis/dieweil sie ihre grös-
ste krafft hat/die dörre an der lufft/
oder in einem Backoffen (vnd nit
an der Sonnen/denn die Sonne
nimbt ihr die krafft) die mach zu
puluer inn einem mörser/vnnd thu
sie inn einen leinen sack/als vil dich
gelüftet/oder als vil du wein ma-
chen wilt/vnd in dem lesen/wenn
der most verhozen hat/vnnd am
satz ist/so henc den sack mit der

D ij ge

gepulverten saluien inn den most/
vnd vermach den spund gar wol/
das kein dampff herauß komme/
weder vom Wein noch von der
saluien. Inn fünff oder sechs tagen
magstu den Wein auffthun / vnd
den sack wider herauß ziehen / so
hastu ein guten Saluien wein / vn
gefehrlich ein viertheyl jars.

Ein ander weiß Sal- uienwein zumachen.

Nim gute gedörte saluien / vnd
weise hefle speen / die gewaschen
vnd gedrücknet sind inn der lufft
(nit an der Sonnen) binde die zu-
sammen / vnd thu sie in ein lehr faß /
vnd geuß darein newen Wein /
oder Wirtz / vnd spundt das faß
zu / mache es nicht auff / bis das es
iheren

iheren wil/wenn er gieret/fülle das
faß wider vol/so hast du ein guten
Saluen wein.

Vnd wer von dem selben lang
trincken wil/der thue alle abent
also viel guten wein darein/als er
den selben tag auß dem faß gelas-
sen hat.

Wie man weichsel Wein machen sol.

Nim̄ weichsel so viel du wilt/
vñ send sie in einem kessel / das sich
die kerer alle dauon ledigen / dar-
nach thu sie in einen dickē zwilchē
sack/vnnd presse sie auß / wie man
Weinber außprest/vnnd gisse den
safft in ein seplein / vnnd geuß gu-
ten wein dazu/vnd mache das faß
zu/vnnd laß zusammen verjeren/

D iij durch

durch ein holler rhdlein / welches
man in den spund stecken sol / vn-
gefeylich acht tage / als denn stich
in an / so hastu ein guten Weychsel
wein.

Wie man Alentwein machen sol.

So vil du alentwein machen
wilt / so nim zu einem jeden eimer /
ein pfund gedörte alentwurtz / vnd
wenn die wurtz abgebrochen ist /
weil sie noch grün ist / so wasche sie
schön / vnd henc̄ sie in die lufft / vnd
habe acht das sie nit schimlich wer-
de / Darnach im herbste wasche sie /
vnd lege sie in einen kessel oder ha-
fen / vnd geuß darzu auff ein pfund
vier maß guter wiertz / dec̄ es zu /
laf wol sieden / vnd schaume es
wolf

wol/vnd so die alentwurtz wol
 gesotten hat/so nimb sie herauf/
 auß der brüe/stof sie wol in einem
 mörser/treib sie durch ein secklein/
 thu sie darnach wider inn den vo=
 rigen safft/darnach geuß es inn ein
 schön schefflin/setze es inn den kel=
 ler/das es küle/darnach geuß es al=
 so in ein faß mit most/vnd lasse es
 gehen/vnd so der most in acht ta=
 gen nicht gehen wil/so mache ein
 kolfewer dazu/so gieret er/vnd die
 würtz erhebt sich zu dem spunde/
 Darnach fülle das faß zu/vnd kost
 den wein im faß/ist er zu bitter / so
 geuß mehr most dazu / also hastu
 ein guten alentwein.

Wie man Isopwein machen sol.

D iij Klun

Nim ein sauber faß/dem schla-
ge den boden auß / thu darein ein
schicht gedörte gut Isop/ vnnnd ein
schicht weinbeer / eins vmb s an-
der/biß das faß vol wirdt/ vnnnd
mach das faß zu / geuß darnach
darein gutē most/biß das faß vol
werde/spund das faß zu/vnd steck
ein rhor daran/vnd in das rhor ein
weides gertlein/vnd lasse es verje-
ren/so hastu ein guten Isop wein.

Auff dise weise mag man Erd-
berwein machen / Doch das man
das Erdberkraut abbreche/ehe die
beer daran wachsen.

Ire/auff solche weise mag man
ein speen wein machen/Doch das
mā die speen vom weiß hefle holtz
auffs aller dünnest schneide / vnnnd
sie im brunwasser ein nacht ligen/
vnd in der lufft drücken lasse.

Wie

Wie man Wachalter wein machen sol.

Nim Wachalterbeer / auff
ein eymer Weins / ein pfund die
frisch sind / zustof sie klein inn ey-
nem mörser / thu sie inn ein lehren
sack / vnd henc die inn neuen
Wein / der am satz ist / mach den
spund zu / laß im in acht tagen kein
luft / so hastu ein guten Wachal-
terwein.

Auff dise weyse mag man Zim-
metrinden Wein machen / vnd
nimb auff ein eimer vier lot Zim-
metrinden.

Des gleichen macht man Ne-
gelein Wein / nimb auff ein eimer
weins drey lot negelein.

D v Nun

Zu folgen her=
nach etliche einschlege /
das faß damit zu bereyten /
das der wein gut bleib.

Nim ein pfund schwefel / ein lot
langen pfeffer / ein halb lot Campf
fer / ein halb lot zimmetrinden / ein
lot muscaten / ein lot muscaten blu
men / ein lot gestossen feyehwurtzel /
ein lot galget / ein lot Zenif / ein lot
imber / ein lot limanum / anderhalb
lot entian / anderhalb lot parisfö
ner / anderhalb lot alain / ander
halb lot zitwer / anderhalb lot wey
rauch / drey lot wiesmut / 31. Pa
radis holtz.

Sölche stück stof zu puluer /
darnach nimb gelben Schwefel /
zerlaß den / vnd nimb ein grob leine
tuch

tuch/ zeuch es durch den schwessell
strey das pulner darauff/ so hastu
ein guten einschlag.

Von disen einschlegen magstu
denn ein stück schneiden / vnd die
wein zurichten / nach deinem gut
düncken.

Ein ander guter einschlag.

Zwey lot schwessell/ein lot paris
körner/ein lot wirdan/retigsamen/
ein lot langē pfeffer/ein lot kampfer/
anderhalb lot zimetrinden/ an-
derhalb lot muscatenblumen/ drey
lot weinstein/zwey lot gestoffenen
seyelwurzeln/ein lot galgat / ander-
halb lot mastix/2. lot Weyrauch/
4.lot Wessmut /2. lot Zenis / an-
derhalb lot imber / anderhalb lot
cordamum /anderhalb lot Zitwer.

Ein

**Ein ander guter
einschlag.**

Ein lot negelblummen / ein lot
zitwer / ein lot feyelwurtzel / ein lot
mastix / ein lot storax Calamita /
zwey lot ladamum / sechs lot nes-
selwurtz.

Ein ander einschlag.

Zwey lot schwessel / zwey lot
wismut / ein lot langen Pfeffer /
zwey lot negelein / ein lot musca-
ten / ein lot weissen Weyrauch / ein
lot camphor / ein lot paris korn /
ein lot peterlin wurtz / ein lot junc-
fray wachß / ein lot römisch kum-
mel / ein lot zimmetrinden / ein lot
muscatenblumen.

Vom

Vom Bier.

Wie man Bier machen

sol/das es lieblich zu trin-
cken sey.

Sendt darein ein halb pfundt
rote Benedicten wurzeln / mit
wilder Salbey.

Wenn ein Bier wer sawr

worden/auff dem potich/
oder sunst.

Nimb ein hand vol saltz oder
zwo/so viel aschen / vnd ein maß
oder zwo Wasser / vnd thue das
darunter/vnd leg ein tuch mit ei-
nem spund davor/ vnd laß es also
verbrausen.

Das

Das Bier inn der Brew
scharpff vnd wolriechend
zu machen.

Nim ein Stück hartz/vnd wenn
man den hopffen seud/würff es inn
den hopffen / vnd laß es darinnen
sieden/so wirdt es gut.

Wie man ein Bier / das
sauererzget sol newern:

Schneid speen auß Kien / vnd
würff sie auß das Bier/dieweyl es
noch ganz warm ist/ benimbt jm
das saurenzen.

Wie man ein Bier sol wol
geschmack machen.

Man solle nemen ein faß/
darayß man Wein geschenckt hat/
darein

darein sol man das bier 'giessen / so
nimbt das bier den geschmack des
weins an sich / vnnnd wirdt schön
vnd lauter.

Das das bier süß bleybe
bis auff den letzten drunck.

Thue hopffen vngesehlich drey
oder vier handuol inn ein drey ey=
merisch faß / vnnnd spund das faß
wol zu / vnnnd setz das faß auff den
boden / vnnnd zepff es vnden an der
seyten an / vnnnd laß ihm auff den
obersten boden ein lufftloch / so blei
bet das bier gut.

Wie man ein bier zu som=
merszeiten / wenn man es auß=
schencken wil / sol bewaren / das es
nicht abfalle / oder sich verkerre / wie
lang man darauf schencket.

Nim

Nim ein frisch ey / das an dem sel-
bigen tage / so man das bier wil an-
stechen / gelegt ist worden / vnd thu
es inn das fas biers / darnach nimb
leim / vnd mach den spund wol
zu / so bleibt es frisch vnd gut.

Das ein Bier nicht sauer wirdt.

Herck centaur / das man hent
tausent gülden kraut / vnd Ber-
tram darein / die zwey kreuter ver-
hüten allen vnflat. Du magst auch
Lorber darein thun / gibt ihm ein
köstlichen geschmack.

Wie man frisch Biere sol machen.

Nim büchen holz aschen / so oft
ein

30
ein eimer bier/so offt ein hand vol
aschen / menge sie mit ein wenig
bier vntereinander / vnd geuß sie
in dz faß mit dem bier/rür es wol/
vnd laß es gehen/so ist vnd wirt
es gar frisch.

Wie man Bier sol schön/lieblich vnd klar machen.

Nim saltz vnd bierheffen von
dem selben Bier / das du bereiten
wilt/ vnd schlag vnd rür es wol
durch einander/so nun das gesche-
hen ist / so laß des Biers auß dem
faß/thu es zusammen/ vnd rür es
auch wol durch einander / vnd
schüt es inn das bier / darnach laß
gehen/vnd fül das faß vol (Denn
es muß im eingiessen ein wenig
lebe

leer sein / das man es mag rüren)
vnd etlich thun halb so vil Alaun
zum saltz. Es ist aber genugein
viertheyl mit dem saltz gemischer.

Wie man grob vnd sawer
Bier / gut lüftig zu trincken
sol machen:

Zerstos weizen / vnd vermeng
jn mit heffen des selben biers / vnd
schüt es in das faß / oder henc des
zerstossenen Weizen mitten inns
faß / es wirdt süß / Oder nimb hef-
fen / vnd drey eyer zu einem fuder /
klopffs in einander mit gutē bier /
geuß in das faß / das bier wirdt lu-
ftig zu trincken / so es gieret.

Wenn ein bier nach dem
faß stincket.

Nimb

31

Nim ein büntelein von 35. weizen
körnern/henck's inn das faß/oder
der nimb reinfal/wachalter/vnd
des heiligen geists wurzel/benedic-
ticken/die rote/eins so viel als des
andern/vnd vier frische oder herte
eyer/vnd henck es in das bier faß.

Wenn das bier wil sauer werden.

Nimb aschen von beyfuß/zu ei-
nem eimer ein halbe hand vol/vnd
so vil büchene aschen/geuß bier da-
runter/misch es wol vntereinan-
der/das es wirt als ein muß/geuß
als denn in ein ganz suder bey an-
derthalben maß/vnd misch es wol
mit einem besen/laß also ligen.

Das sich ein bier nit verfere.

℞ ij Nim

Nim linden bletter / nuß bletter /
beyfuß / eins so viel als des andern /
vnd halb so viel werimut / vnd
hend's in das bier. Auch legen et-
liche schöne kieselstein darein / auß ey-
nem fließenden wasser.

Wiltu sawr bier süß ma-
chen / das es wider gut vnd
wolgeschmack werde.

Nim auff ein eimer bierß / ein
pfund kreiden / vnd ein hand vol
salz oder zwo / stoß es vnter ein-
ander / vnd laß inn emer pfannen
wol heiß werden / geuß als denn
daran ein maß lauter brunne was-
ser / vnd rürs wol vnter einander /
geuß ins sawer bier / vnd rürs mit
ein stecklein wol vnter einander /
so wirts wider süß.

Wie

Wie man wermutbier machen sol.

Nim wermut die gut ist / vnd
lege sie in ein külfas / vnd wenn du
die wirtz aufkülen wilt / so geuß
sie vber die Wermut / vnd deck's
wol zu mit einem tuch / vnd wenn
es zeyt ist / so gib jm die heffen / vnd
laf die Wermut darinnen ligen /
vnd laf wol verjheren / darnach
füle es in das fas / darinnen es bley-
ben sol / vnd leg darein weisse heffe
speen / vnd laf wol darüber ver-
jheren / vnd füle es alle tag / morgens
vnd abends / so viel du dauon ge-
truncken hast / so hastu alle tag ein
gut Wermutbier.

Nun folget hernach wie
man guten essig machen sol.

℞ iij Wie

Wie man ein guten essig machen sol.

Wens im summer ist/so nimb ein
eichens feflein/vngeserlich wie ein
halbe tunnen/vnd thu darein auff
das vierte yl guten essig/vnd spund
das feflein zu/lege es an ein ort im
hauß/da man viel hin vnd wider
gehet/das mans mit den Füßen
weidlich hin vnd wider weize/sol
ches sol geschehen/vngeserlich sie-
ben wochen / Darnach spund es
auff / vnd lege es auff ein leger/da
es trucken liege/vnd was du dar-
nach darein fülle wilt/es sey wein
oder bier/das siebe zuvor vnd ver-
schaume es wol/gieß als denn da-
rein/als viel du puiffest/das der es-
sig noch saur genug sey/das er mag
arbeyten inn die Materia/die man
darein

darein gossen hat/so bleibt er gut/
den wenn man zu vil darein geust/
so verdirbt er.

Auch sol man vnten im faß/dar-
innen der essig ist/ ein zapffenloch
bozen/darauf man lassen kan/vnd
oben vngesehlich ein zwere hand
vom boden auch eins/damit man
im lufft laß/wenn man darauff las-
sen wil/denn der spund sol auffs al-
ler gehelst zugemacht sein/dz kein
lufft zum Essig kommen kan/die-
weil er sich oft vom lufft verkeret.

Auch magstu in das faß thun
sauerteig/ gemenget mit gestosse-
nem pfeffer/so groß als ein Faust/
vnd darunter ein löffel vol Honig/
so wirt der essig gar bald sauer.

Weiter ist zuwissen/wen man
mit wein oder bier hat/damit man
den essig fällt/so mag man ein we-

℞ iij nig

nig regenwasser / nicht gesott: n/
aber doch gewermet / darein füllen/
das macht auch Essig.

Ein ander kunst / wie
man guten Essig machen sol.

Pres vnzeytliche weinber auß/
vnd seibe sie schön / vnd send an-
dern essig darunter / vnd so er drey
Tag gestanden ist / so seibe ihn
von dem leger oder hessen ab / das
thu oft / so hastu ein guten essig.

Wie man essig auß bier
machen sol.

Nim bier vnd seuds / vnd wenn
es kalt wirdt / so leg sauerteig dar-
ein / vnd geröst oder gebrente er-
beyssen / so wirdt bald guter Essig/
oder würff in die buten / so es gieret /
ein

ein halbe hand vol Weitze Körner/
vnd rinden von bircken holz / ge-
behet brot / vnd ein wenig mirren /
so wirt auß dem bier **Essig**.

Item nimb vier maß wassers /
vnd ein quintlein Hönig / vnd ein
maß weins / vnd seud es wol / thue
es in ein seflein / vnd fül den **Essig**
darauff / so wirt er bald sawer.

Ein ander kunst / **Essig** zu machen.

Nimb welsche nußbaum wur-
zel / vnd thu die in Wein / so wirdt
sehr guter essig darauf.

Seud wein in ein küpffern oder
messenen geschierz / vnd schaum
den wein / so hastu inn zweyen ta-
gen guten essig.

Oder nimb ein rocken brod / ge-
E v röstet

röset inn einer messenen pfannen/
vnd laß nicht gar sieden/ vnd thue
denselben wein inn ein krug/so hast
du inn drey oder vier tagen guten
essig.

Essig zu machen/ das ihn
einer bey sich mag tragen.

Nim weinstein/vñ leg den neun
oder zehen tag in ein guten Essig/
thu in darnach herauf/vñnd dörre
in an der sonnen/vnd wenn er wol
dürre ist/so leg ihn wider zehen tag
in essig/darnach trückne in wider/
vnd stoß in/das er gar klein zu mel
werde/vnd wenn du wilt/so thue
ein wenig inn ein glas vol wein/so
hastu ein guten essig.

Ein ander kunst Essig
zu machen.

Nimb

Nimb gar ein trucken faß/vnd
 laß es wol binden/thu darnach ein
 halb maß guts gebrents weins da
 rein/vnd schlag das faß zu/welgere
 es wol hin vnd her/bis der gebren-
 terwein hinein gehet/vñ so es vnge-
 fehrlich ein tag oder zwen / an der
 sonnen gelegen ist/so schüt als denn
 ein maß essig darein/vnd so dersel-
 big auch ein tag oder zwen darin-
 nen gewesen ist/als denn nim den
 antometen essig/seud in inn ein
 messenen geschirz / verschäum ihn
 sauber/vnd thu in also warm inn
 das faß/vnd zu ein sechs eimerichē
 seflein/ein vierdung Pertram/zer-
 schlag die wurzel / binds an ein
 schnur/vnd laß es auff den halben
 theyl ins faß/vnd vor oben ins faß
 ein lufftlöchlin / das stets offen sey/
 vnd spund das faß sunst gehebe zu.
 Guten

**Guten essig zu machen /
auff ein andere weys.**

Baß sauer vrhab inn einem
baß ofen/ vnd leges inn ein war-
men wein/ vñ vermach den spund
so hastu guten Essig.

Essig starck zumachen.

Lege oder hendß sauer vrhab in
ein bösen oder schwachen essig / so
wirt er starck / setze in an ein warm
ort.

Roten essig zu machen.

Lasß den essig ein nacht oder drey
vber klapper Rosen/oder grasblu-
men stehen/so wirt er schön rot.

Man mag auch wol von bla-
wen korn blumen / von Lauendel
oder rosmarin / vnd dergleichen/
wolgeschmacken Essig machen.

Ander

Ander künst von
kreuter wein.

Wie man einen guten ge-
bachenen schlehen Wein
machen sol.

Nim schlehen die wol reiff sein/
vnd stoß sie wol klein/ vnd mach
darauf klein tügelein/ vnd thue sie
auff ein bret/ vnd thu sie in ein back-
ofen/ vnd laß sie wol aufbacken/
darnach hebe sie auff / das sie dru-
ßen bleiben / vnd nicht schimeln/
darnach nim rote weinbeer/ streif
sie von den stilen/ thue die in ein
bratpfannen/ vnd backe sie auch/
das der safft darbey bleibe / dar-
nach nim die schlehen vnd wein-
beer zusammen/ thue sie in das zu-
gericht faß/ vñ geuß darüber gute
witz

wirz/vnnd mach in zu/laß im kein
lufft/bis das er jheren wil/darnach
mach in auff/vnnd laß verjheren/
vnd wenn er am satz ist/so laß auß
dem faß (ein tag drey mal) vier
maß wein/vnnd geuß in alwegen
von oben wider ein/vierzehen tag
lang.

Vnd disen wein solt du nicht
anzepffen / bis der schleedorn ver-
blühet hat.

Wie man weissen wein rot machen sol / er sey alt oder new.

Nimb zu ein eimer ein pfund
gedörte Kornblumen / thu diesel-
ben mit ein seidlein branten wein/
inn ein groß glas / mach das glas
zu/das kein lufft dazu komb/laß es
drey

drey tag stehen/darnach geuß es in
den wein/so hast du ein guten ro-
ten wein.

Oder nimb heidelbeer / die man
auch heist Schwarzbeer/zerstosse
sie / vnnnd mache kugel dauon/bach
sie im ofen wol auß/die thu inn den
most/ auff ein eimer zwey pfund/
so hast du ein guten roten most.

Ende dieses Büchleins.


Gedrückt zu
Nürnberg /durch
Johann vom Berg/
vñ Ulrich Neuber.


Faint, illegible text, likely bleed-through from the reverse side of the page.


Faint, illegible text, likely bleed-through from the reverse side of the page.

Faint, illegible text, likely bleed-through from the reverse side of the page.









Universitäts- und Landesbibliothek
Sachsen-Anhalt
Magdeburg

Edificare domos et pascere ovium
Sicut ad expectatum per ovem dicit dicit.

AB: 154405

ULB Halle

3


002 181 886



56.

VD 17





B.I.G.

Farbkarte #13



Kellermeisteren.

ündlicher be

Wie man alle wein
 en zufellen bewaren / die
 ften widerbringen / Kreuz
 / Bier/ Essig/ vnd alle anz
 rency machen sol / das sie natura
 vnd allen menschen vnscheds
 lich zu trincken sind.

gen auß den fürnembsten
 ern / natürlicher Künsten

olchen stücken bewert / der
 in Truck vorhin nie außgangen.

Durch
 n Schneider / von Eger.
 nberg/ M.D.LXIII.
 Cum Priuilegio

